



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU

Komunikadu Imprensa

Distritu Ermera

11 Maiu 2015

Komunidade feto Suku Samara Distritu Ermera apresia treinamentu JSMP

Iha 7 no 8 Maiu 2015 JSMP, liu husi Unidade Justisa ba Feto no Labarik (WCJU) hala`o treinamentu ba grupu feto na'in 30 iha Suku Samara, Sub-distritu Hatolia, Distritu Ermera. Treinamentu ne'e ho tema 'moris la hó violénsia'.

Partisipante ba treinamentu ne'e aprende kona-ba sira-nia direitu, liga ho direitu umanu Lei Kontra Violénsia Doméstika no provizaun relevante sira kona-ba violénsia hasoru feto iha Kódigu Penál. Alende ne'e divulga mós informasaun kona-ba forma sira husi krime violénsia doméstika, violasaun seksuál no oinsá atu hetan asisténsia.

"JSMP fiar katak liu husi programa treinamentu ne'e, comunidade feto sira bele iha koñesimentu adekuada atu asesu ba sistema justisa formál hodi proteje sira-nia direitu no interese tuir lei haruka," dehan Luis de Oliveira Sampaio, Diretór Ezekutivu JSMP.

Xefe Suku Samara ne'ebé representa husi Sr. Onesmu Valenti Brites, iha ninia abertura haktuir katak treinamentu ne'e primeira vez akontese ba sira nia suku no sira konsidera informasaun ne'ebé mak JSMP hato'o kona-ba feto ninia direitu no Lei Kontra Violénsia Doméstika no Kódigo Pénal, importante tebes ba sira. Ho treinamentu ne'e bele muda hahalok individu no família atu moris livre husi violénsia, no sira mós hatene oinsá atu prosesu kazu violénsia doméstika no violasaun seksuál ne'ebé mak akontese iha sira ninia comunidade.

Partisipante sira dehan katak durante ne`e sira infrenta problema iha sira ninia uma laran, maibé sira la hatene katak ne`e krime no oinsá atu prosesu.

Relasiona ho preokupasaun sira ne`e, JSMP esplika katak problema ne`ebé mak akontese iha uma henesan ameasa, baku malu entre membru família, trata-malu, ne`e konsidera hanesan krime violénsia doméstika, wainhira akontese tenke lori ba polísia. Ema seluk ka viziñu sira ne`ebé hatene kona-ba violénsia doméstika ruma sira iha obrigasaun tuir lei atu lori kazu ne`e ba polísia. Nune`e mós profesional saúde sira ne`ebé simu ema ruma experensia violénsia doméstika, sira iha obrigasaun atu refere kazu ne`e ba autóridade polísia.

JSMP observa katak iha treinamentu ne`e partisipante hotu iha interese boot atu aprende no rona ho diak bainhira fasilitador sira apresenta matéria. Ne`e hatudu katak sira konsidera informasaun sira ne`e importante ba sira.

Treinamentu ne`e realiza ho apoiu finanseiru husi **The Royal Norwegian Embassy** iha Jakarta, Indonézia.

Atu hetan informasaun kle`an favor kontaktu direktamente:

Luis de Oliveira Sampaio

Diretór Ezekutivu JSMP

Telefone : 3323883/7295795

Diresaun e-mail, luis@jsmp.minihub.org